

Kosa Moja la Gharama Kubwa

Mungu amemfanya mwanadamu mnyofu; lakini wamebuni mavumbuzi mengi. Mhubiri 7:29.

Kitabu cha Mwanzo kinatoa taarifa dhahiri kabisa kuhusu maisha ya kijamii na ya mtu binafsi na bado hatuna rekodi ya mtoto aliyezaliwa kipofu, kiziwi, kiwete, mlemavu au punguani. Hakuna mfano wowote ulioandikwa wa kifo cha kawaida katika uchanga, utoto au ujana wa mapema. Hakuna maelezo ya wanaume na wanawake wanaokufa kutokana na magonjwa. Taarifa za vifo katika kitabu cha Mwanzo zimeandikwa hivi: “Siku zote za Adamu alizoishi ni miaka mia kenda na thelathini: naye akafa.” “Siku zote za Sethi ni miaka mia kenda na kumi na miwili: akafa.”

Mungu alimjalia mwanadamu nguvu kubwa sana ya uhai kiasi kwamba ameweza kuhimili mkusanyiko wa magonjwa ulioletwa juu ya jamii kutokana na tabia mbaya na ameendelea kuwapo kwa miaka elfu sita. Ukweli huu kwa wenyewe unatosha kututhibitishia nguvu na nishati ya umeme ambayo Mungu alimpa mwanadamu wakati wa kuumbwa kwake. Ikiwa Adamu, wakati wa kuumbwa kwake, angekuwa hajajaliwa nguvu ya uhai mara ishirini zaidi ya ile ambayo wanadamu wanayo sasa, basi jamii, kwa tabia zao za sasa za kuishi kinyume na sheria za asili, isingekuwapo.

Mungu hakuumba jamii katika hali yake dhaifu ya sasa. Hali hii ya mambo si kazi ya Mungu, bali ni kazi ya mwanadamu. Imesababishwa na mazoea mabaya na matumizi mabaya, kwa kuvunja sheria ambazo Mungu amezifanya ili kutawala kuwepo kwa mwanadamu.

Mungu alimuumba mwanadamu kwa ajili ya utukufu Wake mwenyewe, ili baada ya kupimwa na baada ya majaribio familia ya wanadamu iweze kuwa umoja na familia ya mbinguni, ikiwa wangejionesha kuwa watiifu kwa kila neno Lake.

Kwa Hawa ilionekana kama ni jambo dogo kumwasi Mungu kwa kuonja tunda la mti uliokatazwa na kumjaribu mume wake pia kuasi; lakini dhambi yao ilifungua milango ya dhiki duniani. Ni nani anayeweza kujua, katika wakati wa jaribu, matokeo ya kuogofya ambayo yatatokana na hatua moja mbaya?